


Fanambaran'Atoa Karl Wycoff

Talata | 2 Novambra 2010



Fifaliana ho ahy ny tonga eto Antananarivo. Tiako hosoritana ety am-boaloohany fa ny antony nanirahan'ny Governemanta Amerikana ahy taty dia ny hihaona amin'ireo tompon'andraikitra isan-tsokajiny eo amin'ny tontolo politika sy sosialy eto Madagasikara, ary hiresadresaka momba ny fanahian'i Etazonia noho izao disadisa politika tsy miato eto Madagasikara izao.

Izao fitsidihana ataoko izao moa dia tafiditra ao anatin'ireo ezaka ataon'ny Governemanta amerikana miaraka amin'ireo mpiara-miasa aminy eo amin'ny sehatra iraisam-pirenena sy ny vahoaka Malagasy; ka ny tanjona dia ny hahitana vahaolana iaraha-mitantana, iaraha-misalahy ary maharitra, ao anatin'ny fanajana ny fenitra demokratika.

Vonona hatrany izahay hanohana izay lamina politika azo ekena mitondra ho amin'ny famerenana amin'ny laoniny ny fitantanana demokratika amin'ny alàlan'ny fididianana malalaka sy marina. Vonona hatrany i Etazonia hanampy ny vahoaka Malagasy ao anatin'izao vanim-potoana sarotra eo amin'ny tantarany izao, amin'ny alàlan'ireo fandaharana maro karazana natao hanampiana ny mponina, izay mitontaly 85 tapitriza dolara; io rahateo no fandaharana lehibe indrindra iarahan'ny firenena Malagasy amin'ny firenena iray manokana.

Tsy mbola niova torak'izany koa ny fanohanana'i Etazonia ny famerenana ny fitantanana demokratika, araka ny lalàm-panorenana ary maharitra eto Madagasikara.

Heverinay fa mbola maro ny olana goavana ao anatin'ireo lamina politika ankehitriny, anisan'izany ny fomba namoronana sy fomba fiasan'ireo andrim-panjakana tetezamita samihafa, ny fitsapan-kevi-bahoaka momba ny lalàm-

panorenana kasaina hotanterahina ny 17 Novambra, ary ireo fifidianana neverina hokarakaraina misesy aorian'izay. Tsy mety mahafeno tsara ny fepetra maha-demokratika sy iaraha-mitantana ireo rafitra sy lamina politika noforonin'ny fitondrana ankehitriny. Noho izany dia manao antso avo amin'ireo ankolafy rehetra voakasika izahay mba hiverina hifampidinika ka hiara-hamaritra sori-dàlana hiverenana amin'ny fitantanana demokratika sy araka ny lalàm-panorenana, hiafara amin'ny fifidianana malalaka sy marina.

Tiako hotsindriana eto fa manana andraikitra miavaka ireo mpitarika politika eo antoerana ankehitriny, ary manana fotoana manokana azony hararaotina izy ireo hametrahana izay fepetra ilaina rehetra hisian'ny lamina politika misokatra ho an'ny rehetra. Mino koa izahay fa samy manana anjara toerana goavana ao anatin'izao ny antoko mpanohitra sy ireo fikambanana tsy miankina ary ireo fikambanan'ny fiaraha-monim-pirenena eto Madagasikara, izay samy hita fa mavitrika.

Manao antso avy amin'ireo ankolafy rehetra i Etazonia mba hifady izay hetsika mety hiteraka herisetra indray, ary manainga mavesatra ny mpitandro filaminana mba tsy hanao hetsika izay mety hoheverin'ny tompon'andraikitra politika sy avy amin'ny fiaraha-monim-pirenena ho fitsabatsabahana na fandrahonana azy ireo eo am-pikatsahany vahaolana amin'izao disadisa izao.

Niteraka faharavana mihoampampana teo amin'ny toe-karena Malagasy izao disadisa politika tsy mitsahatra eto Madagasikara izao, ary niteraka fahasahiranana tsy nilaina akory ho an'ny vahoaka Malagasy. Noho ireo fanapahan-kevitra sasany noraisin'ny fitondrana HAT, dia voatery araka ny lalàna manan-kery any aminy i Etazonia hampiato ny fandrais'anjaran'i Madagasikara tao amin'ny *African Growth and Opportunity Act* (AGOA), sy hampsahatra tanteraka ny fandaharana *Millennium Challenge Corporation*. Na izany aza anefa dia hotohizan'i Etazonia ireo ezaka hanampiana an'i Madagasikara hiverina amin'ny fitantanana demokratika izay mety hitarika amin'ny famerenana amin'ny laoniny an'ireo fandaharana ireo sy ny hafa koa.

Efa ela i Etazonia no nanana fifandraisana nahomby sy naharitra tamin'ny vahoaka Malagasy, ka dia manainga ireto farany izahay mba hametraka avy hatrany izay lamina demokratika sy iaraha-misalahy hiverenana amin'ny fitantanana araka ny lalàm-panorenana, ka hahatongavana amin'ny fifidianana malalaka sy marina ao anatin'ny filaminana. Tohananay tanteraka ny ezaka fanelanelanana tsy miato ataon'ny Vondrona Fampandrosoana ny Faritra Atsimon'i Afrika (SADC), ary heverinay fa manana andraikitra hanohana sy hanampy amin'ny fikatsahana vahaolana ny fiaraha-monina iraisam-pirenena, araka ny fanaony any amin'izay firenena mandalo disadisa politika maharitra.